

Ao, Khud Dekh Lo 9

Phaltā-Phūltā īmān



phaltā-phūltā īmān

Faith that Flourishes

by Bakhtullah

[*Ao, Khud Dekh Lo 9*]

(Urdu—Roman script)

© 2023 www.chashmamedia.org
published and printed by
Good Word, New Delhi

The title cover is a modified image of
iessephoto <https://pixabay.com/illustrations/wheat-ears-nature-mature-dawn-3781755/>.

Bible quotations are from UGV.

for enquiries or to request more copies:
askandanswer786@gmail.com

Fahrist

Siyāsī Yā Rūhānī Īmān?	1
Kachche Īmān kā Bīj	3
Īmān ke Bīj se Nāzuk Paudhā	5
Īmān kī Āzmāish	6
Īmān kā Phal	8
Injīl, Yūhannā 4:43-54	9

Khudāwand Īsā Sāmariyon ke ilāqe se hokar dubārā Galīl meñ pahuinch gayā. Sāmarī Yahūdiyon ke dushman the. To bhī rāste meñ kaī ek Sāmarī us par īmān lāe the.

Siyāsī Yā Rūhānī īmān?

Use dekhkar Galīlī khush hue.

► *Kyon khush hue?*

Bahut-sāre log Fasah kī īd manāne Yarūshalam gae the. Wahān unhoñ ne us ke azīm kām aur bāten dekh lī thīn. Unhoñ ne bare josh se use khushāmdīd kahā.

Magar Khudāwand Īsā ne un ke josh se dhokā na khāyā. Wuh to khūb jāntā thā ki nabī kī us ke apne watan meñ izzat nahīn hotī. Maqāmī logoñ kā josh jald hī ṭhanḍā paṛ jāegā. Jald hī un kī khushī kāfūr ho jāegī.

► *Kyonī?*

Islie ki wuh us par īmān nahīn rakhte the. Wuh sirf apnā kām us se karwānā chāhte the. Un kā maqsad rūhānī nahīn thī balki siyāsī.

► *To phir Khudāwand Īsā logoñ mein kyā dekhnā chāhtā thā? Kyā yih ki wuh use pīr bābā mān leñ?*
Hargiz nahīn!

► *To phir wuh kyā chāhtā thā?*

Wuh chāhtā thā ki wuh us par īmān lāen.

► *Us par īmān lāne kā kyā matlab thā?*

Yih ki wuh mān leñ ki Īsā Masīh merā Khudāwand hai. Wuh mujhe najāt de saktā hai. Wuh mere gunāhoñ ko miṭā saktā hai. Wuh mujhe jannat meñ dākhil hone ke lāyq banā saktā hai. Hāñ, wuh merī zindagī tabdīl kar saktā hai.

Jin Sāmariyoñ se uskā pālā paṛā thā unhoñ ne yih bāt mān lī thī. Sāmariyoñ ne iqrār kiyā thā, “Ham ne ķhud sun aur jān liyā hai ki wāqaī duniyā kā najātdahindā yahī hai.”

Chalte chalte Ƙhudāwand Ōsā apne shāgirdoṇ ke sāth Qānā pahuñch gayā. Pichhlī bār Qānā meñ ek mojizā huā thā. Ek shādī par pānī mai meñ badal gayā thā.

Is dafā shādī nahīn thī. Ek ādmī thā. Ek ādmī jo sakht pareshān thā. Yih ādmī shāhī officer thā. Ain usī waqt uskā beṭā Kafarnahūm shahr meñ sakht bīmār par̄ gayā thā. Kafarnahūm taqrīban 30 kilometer dūr thā. Qānā pahāṛī par thā jabki Kafarnahūm kāfī nīche thā. Wuh jhīl ke kināre parā thā. Wahān jāne ke lie 500 meter utarnā partā thā. Ek din meñ pahuñchnā mushkil hī thā.

Kachche Īmān kā Bīj

Jab is officer ko ittalā milī ki ustād Galīl pahuñch gayā hai to wuh bhāgkar us ke pās āyā. Us ne thartharāte hue minnat kī, “Zarā mere ghar āeñ jo nīche Kafarnahūm meñ hai tāki mere beṭe ko shafā mile. Is waqt wuh marne ko hai.”

Ham kah sakte hain ki yih officer Masīh ke bāre meñ dūsre Galīliyon kī-sī soch rakhtā thā. Wuh

siyāsī soch rakhtā thā. Lekin ab uskā betā marne ko thā. Jis tarah log madad ke lie pīr ke pās jāte haiñ usī tarah wuh ghabrāe hue Ƙhudāwand ke pās bhāg āyā. Jo īmān Ƙhudāwand Īsā har ek meñ dekhnā chāhtā hai wuh us meñ kam thā. Kah leñ ki īmān kā bīj hī thā. Phir bhī bāp kā dil apne betē ke lie dhaṛak rahā thā. Jab betā marne ko hai to mān-bāp use bachāne ke lie kyā kuchh nahīn karte.

► *Īsā Masiḥ ne kyā jawāb diyā?*

Us ne ek ajīb-sā jawāb diyā. Kaī bār Ƙhudāwand Īsā aise jawāb detā hai jin se hamen sadmā pahuńchtā hai. Us ne farmāyā, “Jab tak tum log ilāhī nishān aur mojize nahīn dekhte īmān nahīn lāte.”

► *Kyā? Yih kaisā jawāb hai? Aisi guzārish aur yih jawāb! Yih kyon?*

Plastic ke saste khilaune ko thorā istemāl karen to tūṭ jātā hai. Kyā officer kā īmān bhī isī tarah

ṭūṭ jāegā? Yā kyā īmān ke bīj se mazbūt paudhā ug āegā?

Lekin Ḳhudāwand Īsā yih bāt na sirf shāhī officer balki sab sunane wālon se kar rahā thā. Ḳhudāwand Masīh logoṇ ko sachche īmān kī taraf lānā chāhtā hai. Ki un kā īmān siyāsī na rahe balki rūhānī ho jāe.

Īmān ke Bīj se Nāzuk Paudhā

Masīh kī bāt sunkar shāhī officer kā muñh utar gayā. Apne bete kī wajah se wuh tarap rahā thā. Ghighiyāne lagā, “Khudāwand āen to sahī, is se pahle ki merā laṛkā mar jāe.”

► *Officer ne Īsā Masīh ko kyā kahā?*

Khudāwand.

Mān-bāp jab bachche ko kuchh ho jāe to apnī jān dene ko bhī taiyār ho jāte haiñ. Ab bāp ke andar īmān ke chhoṭe bīj se nanhā-sā paudhā ug āyā. Isī lie us ne Ḳhudāwand kahā. Ab tak wuh apne hāth uskī taraf phailāe kharā hai. Ḳhudāwand kī taraf. Pakkā īmān to nahīn hai lekin ek nāzuk paudhā ug

āyā hai. Kyā wuh aur mazbūt ho jāegā yā murjhā jāegā?

Khudāwand Īsā īmān baṛhāne kā māhir doctor hai. Hamārā īmān hameshā kamzor rahtā hai islie wuh mahārat se use mazbūt karne ke muqhtalif tarīqe istemāl kartā hai. Phir bhī wuh hameshā hamārā dukh-dard mahsūs kartā hai. Use officer par tars āyā. Us ne farmāyā, “Jā, terā beṭā zindā rahegā.”

Īmān kī Āzmāish

- *Kyā Īsā Masīh ne farmāyā ki chalo main sāth ātā hūn?*

Nahīn. Na sirf yih balki officer ko ek hukm bhī milā. Use karegā to beṭā zindā rahegā.

- *Wuh kyā thā?*

Jā. Mere bağhair apne ghar jā.

- *Kyon?*

Wuh officer kā īmān āzmānā chāhtā thā. Āzmāte waqt naqlī īmān ukhaṛ jātā hai jabki sachchā īmān aur mazbūt ho jātā hai.

- Kyā officer yih sunkar zid karne lagā ki āpke baḡhair maiñ nahīñ jāūngā?

Nahīñ, wuh chup-chāp chalā gayā. Dhyān deñ ki uskā īmān kis tarah baṛh gayā thā. Pahle Īsā Masīh ko sāth ānā thā. Ab wuh mān gayā ki yih bhī zarūrī nahīñ. Kām ho jāegā. Wuh apne ghar chalā gayā.

Dopahar ek baj gae the jab wuh chalne lagā. Chalte chalte use rāste meñ kahīñ rāt guzārnā paṛā. Agle din wuh abhī rāste meñ thā ki us ke naukar us se mile. Lekin yih kyā thā? Wuh ķushī se nāch rahe the. Jab qarīb pahuñche to pukār uṭhe, “Āpkā betā zindā hai. Wuh ṭhīk ho gayā hai!”

Bāp hairānī se uchhal paṛā. Kyā sach?! Merā betā! Zindā! Merā lāṛlā! Merī āṅkhoñ kā tārā!

Us ne pūchhā, “Uskī tabīyat kab saṅbhal gaī?”

Naukar bole, “Buķhār kal dopahar ek baje utar gayā.”

Yih to kamāl hai! Ain us waqt jab Masīh ne kahā thā ki terā betā zindā rahegā.

Īmān kā Phal

Ham dekh chuke hain ki aksar Galiliyon kā Masīh par naqlī īmān thā. Wuh us se fāydā uṭhānā chāhte the. Lekin wuh yih mānane ke lie taiyār nahīn the ki wuh Khudāwand hai. Ki wuh duniyā ko najāt dene wālā hai.

Is ke muqābale men shāhī officer ke īmān ko dekho. Pahle wuh bhī itnā hī samajhtā thā ki Īsā Masīh pīr jaisā hai jo mere bete ko shafā de saktā hai. īmān kā bīj. Phir Khudāwand Īsā ne use challenge diyā ki tum sirf mojize dekhne āe ho. Is bāt ne use Masīh se dūr na kiyā balki īmān ke bīj se ek nāzuk paudhā ug āyā. Wuh zor-shor karne lagā: Khudāwand, āen to sahī, is se pahle ki merā laṛkā mar jāe. Īsā Masīh ne us ke sāth jāne se inkār kiyā phir bhī wuh māyūs na huā. Uskā īmān aur mazbūt ho gayā.

Jab bete ko shafā milī to shāhī officer kā īmān bilkul pakkā ho chukā thā. Īsā Masīh na sirf uskā pīr ban gayā jo uskī madad kar sake. Wuh uskā

Khudāwand ban gayā. Wuh najāt dene wālā jo is lāyq hai ki maiñ apnī pūrī zindagī use waqf karūn. Shāhī officer kā īmān dekhkar us ke tamām ghar wāle bhī īmān lāe.

- *Rahā ek sawāl: Āpkā īmān kaisā hai?*

Injīl, Yūhannā 4:43-54

Wahān do din guzārne ke bād Īsā Galīl ko chalā gayā. Us ne khud gawāhī dekar kahā thā ki nabī kī us ke apne watan meñ izzat nahiñ hotī. Ab jab wuh Galīl pahuñchā to maqāmī logoñ ne use khushāmdīd kahā, kyoñki wuh Fasah kī Īd manāne ke lie Yarūshalam āe the aur unhoñ ne sab kuchh dekhā jo Īsā ne wahān kiyā thā. Phir wuh dubārā Qānā meñ āyā jahān us ne pānī ko mai meñ badal diyā thā. Us ilāqe meñ ek shāhī officer thā jis kā betā Kafarnahūm meñ bīmār paṛā thā. Jab use ittalā mili ki Īsā Yahūdiyā se Galīl pahuñch gayā hai to wuh us ke pās gayā aur guzārish kī, “Qānā se mere pās ākar mere bete ko shafā den, kyoñki wuh

marne ko hai.” Īsā ne us se kahā, “Jab tak tum log ilāhī nishān aur mojize nahīn dekhte īmān nahīn lāte.”

Shāhī officer ne kahā, “Khudāwand āeñ, is se pahle ki merā laṛkā mar jāe.”

Īsā ne jawāb diyā, “Jā, terā betā zindā rahegā.” Ādmī Īsā kī bāt par īmān lāyā aur apne ghar chalā gayā. Wuh abhī rāste men thā ki us ke naukar us se mile. Unhoñ ne use ittalā dī ki betā zindā hai.

Us ne un se pūchh-gachh kī ki uskī tabīyat kis waqt se behtar hone lagī thi. Unhoñ ne jawāb diyā, “Buķhār kal dopahar ek baje utar gayā.” Phir bāp ne jān liyā ki usī waqt Īsā ne use batāyā thā, “Tumhārā betā zindā rahegā.” Aur wuh apne pūre gharāne samet us par īmān lāyā.

Yoñ Īsā ne apnā dūsrā ilāhī nishān us waqt dikhāyā jab wuh Yahūdiyā se Galīl meñ āyā thā.